



Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко“ Крыница.

Всіх читателєй, котры не вплатили ище пренумераты, просиме выровнати якнайкорше рахункы.

Пренумерата в краю:
 30 грошей місячно,
 80 „ квартално
 1.50 „ полрочно,
 3 зл. рочно.
 В Америкы: 1 дол. рочно.
 В Чехословакии:
 2 кор. місячно, 10 кор. полрочно,
 20 кор. рочно.
 Ціны оголошень:
 Ціла сторона 120 зл., 1/2 сто-
 роны 60 зл., 1/4 стороны 35 зл.,
 1/8 стор. 20 зл., 1/16 стор. 10 зл.;
 оголошеня малы за 1 мм. 20 гр.,
 в тексті 30 гр., перед текстом
 40 гр. При місячном и долшом
 оголошеню значна знижка.

 Конто чекове Нр. 404.155.

Памяти помершим мученикам!

Каждый народ має своих великих и заслуженых для народа людей, перед котрыма прекланят свои головы. Культурны народы строят тым мужам тревалы памятники, пишут о них книги, в котрых описуют их жите и діла и старают ся о того, штобы аж и найменьши фрагменты с их жита были поданы до відомости слідующих поколінь.

Память таких мужей чтят народы уряджанама часто торжественными обходами, при котрых припоминаючи их великы діла, берут собі с них примір и на тых примірах выховуют новы поколіня.

Так робят другы народы, так робиме и мы, устроюючи каждого року талергофскы торжества, на котрых отдаєме честь тым борцам, котры ціле своє жите бороли ся против украинизации и за тоту стойкость, неуступчивость и за щирю любов своєго руского имени, терпіли невинно по австрийских тюрмах и концентрационных таборах, або тыж и жите своє отдали.

Талергофскы свята уряджаме звичайно в літі, бо в серпні перед 22-ома роками по выбуху світової войны, начали ходити по наших селах австрийскы жандармы и на доносы своих вірных наймитов-украинцов начали ся страшны муки и гоненя руского населеня. Тоту сурашну Голгофту, яку пережил втотчас наш народ, памятают ище многы и о ней не будеме ту росписовати ся. Мы хочеме звернути увагу на штоси друге, а именно:

Уж тепер украинцы своят ся до жертв их доноса и старают ся вмовити во всіх, же в Талергофі и других концентрационных таборах мучили ся и терпіли „справдішні украинці“. Мало того, они уж так забрехали ся, же начинают сами в тоту брехню вірити и обрушуют ся и гнівають, як им кто скаже, же в Талергофі был лем оден украинец, зланый добре со своєй злобы и ненависти, а именно „оберляйтнант Чирівський“, котрый

приданый до коменды табору, мучил немилосердно невинный народ и без причины засуджал на „айнца“ и на 2 години „столбка“.

Если уж тепер выдерают нам они наши святощи, то што-ж буде, коли не стане тых, котры там терпіли, коли бракне свідков-очевидцов каиновой работы и забуде ся память о прожитых злых днях. Втотчас напевно не повздержат ся они перед ничим, штобы перекрутити исторычны факты и штобы перекрестити на украинцов невинны жертвы их ненависти и злобы. Они не вдоволят ся прожитыма муками своих жертв, але захотят ище по их смерти выдерти им их руске имя и славу и честь. И той именно славы и чести мы мусиме боронити. Заграбили нам они праві всі наши институты и маєткы за часов Австрии и в часі войны и мы погодили ся с тым, але славы и чести мы им не даме. От того им вара! А штобы задокументовати, кто были и за што терпіли наши народны мученикы, мусиме построити им памятники. Не стати нас на мрамуровы и гранитовы памятники, але стати каждую читальню на книжку, в котрой выпише ся имена и назвиска всіх людей, мученых арестами и другыма карами в часі войны, с поданєм причин ареста. Стати нас также на звичайну деревяну дощку с вбитыма до ней металевыма табличками, на котрых будут вырыты имена и назвиска невинно потерпевших в часі войны. Стати наконец каждую читальню им. М. Качк. и на того, штобы каждого року в день общего собраня членов читальні дала жертву на панихиду за душами померших талергофцов и штобы члены читальні выслушали той панихиды и помолити ся перед талергофском таблицом.

На такы памятники стати нас, а тоты книги, таблицы и ухвалы членов читальні будут свідчити в обороні руского имени, славы и чести померших народных жертв.

О сельскы діти.

Статыстка выказує, же 65% процент дітей на селі єст слабо розвиненых. Причином того являт ся обтяжанє дітей тяжком роботом, котра перевышат их возможности физычны и зле откормленє.

Діти на селі робят тяжко. Уж от наймолодших літ. В літі помагают при полевых работах, пасут статок, няньчат молодши діти и того все ставят их в незавидне положенє. Одном користном стороном их положеня єст велике пространство и свіжий воздух. Санитарны условия по селах представляют ся марно. Если лем 35 процент дітей єст здоровых, то уж тот сам факт єст доказом, же сут они марнійши, як мы того собі воображаме. Хвороты дітей, то звичайно сухоты и шкрафулы. Причином того єст слабе и недостаточне кормленє и злыгыгигиєчны условия. В великой степени здоровлє дітей зависит от здоровлє матерей, котре у нас єст также слабе. На 3000 сельских женщин, збданных через лікарей, два тысячи терпит на ріжны недугы, звязаны с тым, же матери берут ся до работы зараз по породі, што отбиват ся на их здоровлє фатально. Діти на селі не мают властиво дітинства, бо уж от вчасных літ мусят бороти ся с нуждом. Выховавчим осередком для них має быти школа, котра старат ся о лучшу, здравшу атмосферу для дітей и о вытворенє таких условий, якых бракує им в хаті. Школа має быти тым другим домом, але на жаль не все сполняют она свои задачи, а кромі того много дітей не ходит до школы (в прошлом році понад миллион дітей в школьном віці не користало с науки в школі).

Причином того єст мале число школьных будынков, учительских етатов и велике отдаленє от школы. Школа єст нераз отдалена от хаты о яке 7 и 10 км. В сильны морозы, без обутия и теплої одежи перебує такого пространства єст просто невозможне. Діти остают в хаті, овиты в марну одеж и выходят на світ аж на

весну, коли сонце ogrіє землю. Жиют в хатах слабо ogrітых и эле провітрених и нич дивного, же не розвиваюот ся належито.

А преця діти, то будучность народа и державы и тому належит сотворити им в дітинстві такы условия, штобы они могли вывирости на сильных и здоровых граждан. До выполнения маме велику задачу. Мусиме напярчи всі наши силы для поборотя лужды на селі, бо лем втотчас поднесе ся также культуральный уровень села и діти найдут користны условия розвита.

Найбольший кооператыв.

Найбольшим кооператывом в Швеции, а може и на цілом світі, єст Штокгольмский Кооператыв Консументов, котрый обходит тепер 20-літє своего существования. Кооператыв тот має перешло 100 тысяч членов. Як великы обороты має тот кооператыв, доказує факт, же в місті о полмиллионном населеню, праві половина жителей купує всьо в том кооператыві.

Экспорт дерева увеличил ся.

В місяці квітні т. р. через гдынску пристань вывезено 24.145 тон деревяного материяла. Вывоз тот єст о 6.635 тон больший от вывозу в квітні 1935 р. Также в отношеню до вывоза в марті т. р. вывоз с квітня єст о 4.332 тон высший.

Перше місце в вывозі занимают дощкы — 18.340 тон, пак копальнякы и столбы 4.118 тон, дыкта — 969 тон, гнуты меблі — 411 тон и деревяны выробы — 300 тон.

Также вывоз дерева через Гданск єст в том часі о 26.423 тон высший и выносит тепер 90.694 тон.

Найдойнійша корова.

Ведля статыстыкы переведеной в кружках контролі в р. 1934/35. найдойнійшу корову має рольничя школа в Вацыні. Корова тота называт ся „Малпа“, належит до низинной породы и дала в році 9.420 кг. молока с 293.75 кг. толщю. С породы червено-польской корова „Байка“ в воєв. Білостоцком дала 5.195 кг. молока с 211.89 кг. толщю, а корова „Сорока“ в Пядыках (воєв. Станиславовске) — 5.049 кг. молока, в котром было 211.8 кг. толщю.

Стаєнный навоз дорожший от цукру.

Одна с газет, выходячих в Празі подає, же в Цурыху (Швайцария) платят за цукор с Чехословакии 14 франков за 100 кг., а за 100 кг. коровячого навозу швайцарского платят по 18 франков. Як видиме с того, в Швайцарии можна отходами заплатити за цукор и ище заробити.

ПОМІЩАЙТЕ
ОГОЛОШЕННЯ
В ГАЗЕТИ „ЛЕМКО“

Килько людей выемигровало с Польщи в р. 1936.

Головный Статыстычный Уряд подає, же в часі от 1. січня до 1. мая т. р. выемигровало с Польщи 24.490 людей. С того числа выіхало до других европейскых краєв 15 604 людей, а до краєв позаевропейскых 8.886 людей.

В поровнаню с минувшим роком, число эмигрантов до европейскых краєв увеличилось значно, але зато поменьшило ся число выіхавших до краєв позаевропейскых.

Найбольше людей выіхало на сезонны работы до Латвии (14.107 людей) и до Франции (970 люда). Меньше выіхало до Німеччины и других краєв.

С позаевропейскых краєв, выіхало до Палестыны 4.380 людей, до Аргентыны — 1.902 людей и инчих амерыканскых краєв 1.123 людей. Мало людей выіхало в том році до Злученых Держав Полночной Америкы, Бразылии и Канады.

Италиянско-турецко-совітска угода.

С Льондона доносят, же в политычных кругах возникло подозрїє, же меже Турциом и С. С. С. Р. заключено тайну угоду о том, што в случаю сорваня конференци в Монтре, где идут меже Литвиновым и Англиом переговоры о пзволєню на свободный проход совітской фльоты через проливы, Турция и Совіты заключат двусторонний договор, котрый урегулює их отношеня на Черном морі и в Дарданелях.

Кромі того в Льондоні довідали ся. же идут переговоры также меже совітским послом в Римі Штейном и италиянским министром Чиано. Ціль тых переговоров єст зблизити оба правительства и сотруничати на Середземном морі и змусити Англию ку пересмотру єй позиции на Середземном морі.

Такым способом як бы повстал новый блок, зложеный с Италией, Турцией и Совітов, котрый ставят Англию в трудне положєнє.

Дня 19. липня 1936 чит. им. М. Качковского в Лосю устроює

Талергофске торжество

со слідуючом програмом:

- 1) о год. 9 Богослужєнє
- 2) „ „ 10:30 Посвячєнє креста
- 3) „ „ 11 Поход на кладбище
- 4) „ „ 11:15 Панихида.

В часі торжєства слідуют промовы, деклямаци и пописы хоров. О численну участь доокрестных селян и интеллигенци просит

Выдїл читальні.

Выдїл О-ва Руска Бурса в Горлицах оголошує КОНКУРС

на принятє до своєй бурсы учеников на родных школ и гимназии в Горлицах на 1936/37 шк. рок.

Прошеня о принятє треба вносити до 10 серпня на адрес выдїла Руской Бурсы в Горлицах (ул. Сєнкевича ч. 24).

Прошеня вносит ся также за бывших в мин. році воспитанников. О принятю и высоті місячной оплаты родичи будут повідомлены в другой половині місяца серпня.

Ученикы приняты мусят привезти с собом кромі убраня: сінник, подушку, колдру и коц (або 2 коцы) білизну постелеву (3 простырала и 3 оболочки на подушку), 3 ручникы, што майменьше 4 пары білизны и 5 пар скарпеток, хусткы до носа, щотки до чищеня и куферочок.

Родичи отдаючи своих сынов до бурсы подпишут отвітне зобовязанє.

Выдїл. ■

Война в Абисынии ище продолжат ся?

(П. А. Т.) Рейтер доносит с Хартума о боях абисынского отділа с ескадром италиянскых летчиков под Лехемти.

Около 60 абисынских вояков с племени Амгари, заатаковало 3 италиянскы самолеты в провинци Джимма в ночи внет по опущєню ся на землю италиянов. 31 италиянов было убитых, а оден достал ся до неволі абисынской.

* * *

Дня 6. т. м. рано вооружены банды перервали желізнодорожну и телеграфичну комуникацию меже Акаки и Моджджио на штрєці Джибутти — Аддис-Алеба в ціли обрабованя двох поїздов с провиянтами.

Италиянскы отділы, котры надбіжали с ріжных сторон, отперли напастников, задаючи им тяжкы страты. Бой трєвал цілу ноч. В резульtatі росогнано напастников. Отділы инжинерии направляют тор.

Парыж: Ведля информации французскых газет комуникация на желізнодорожной штрєці Аддис-Алеба — Джибутти єст перервана в пару місцах. Абисынцы мали высадити ж. дор. мост на ріці Ауаш. Инши газеты подають, же высаджено килько мостов и же шкоды сут великы. Положенє италиянов мало погоршити ся. Ище инши газеты подають, же в окрестности озер под Сидамо находит ся сильна абисынска армия, котра веде партизантскы бои с италиянами. Друга абисынска армия находит ся о 70 км. от Аддис-Абебы и робит италиянам много неприятностей.

Ведля суда знатоков Италия буде мусїла выслати до Абисынии ище около 100 тысяч войска в ціли цілковитого опанованя Абисынии.

Треба нищити мухы и комары!

От комаров оганят ся каждый, и певно, преця жалят они сильно и оставляют на скорі свербячи бомблі. Але не лем прото треба их нищити. Треба ище знати, же комары сут розсадниками хвороты, званої маляриом, котра обявлят ся так, же в означеных отступах часу повтарят ся у хворого сильна горячка, котра нищит сильно организм. Тому малярия выступат найсильнйше в окрестностях болотнистых, где находится много комаров. Комар по уколоти хворого на малярию человека, переходит пак на здорового и при уколоти, встрікуе ему под скору заразу.

Понятно не всі комары сут опасны и не всі люды попадають на малярию, бо як и при инших заразливых хворотах, так и ту, оден организм ест отпорнйший а другый меньше отпорный. Але же никто не знае, ци его организм ест отпорный, прото найлучше стеречи ся укушения комаров и нищити их.

Иначе мае ся справа с мухами. Комар сидат лем на живы существа и высасат с них кров, а муха сидат поза тым на всяку нечистоту, падлину, отходы и. т. д. Тож каждая муха ест розсадником не одной, а многих хворот.

Помимо того уважат ся мухы за штоси докучливе, але совсем нешкодливе и не нищит ся их энергично.

Килько-ж то раз видит ся у нас спячи в саді або в поли діти с личками обліплеными мухами, котрых никто не зганят, помимо, же входят дітині до губкы, носа и очей. Ци мати, котра оставила дітя без отвітного накрытия и опеки, подумала о том, где передом сидили тоты мухы, котры тепер обсіди личко ей дітяти? Може сидили они на тілі человека, або звіряти хворого, може на отходах, а може на падлині. А преця невеликий кусник органтыны, смаренный на спячу дітину предохранил бы ю от мух, приносячих бактерии преріжных хворот.

Але муха переносит хвороты ище и в другый способ. Она може оставити их также на поживі, на котру сіла и котру мы потом іме. Бо ясне ест, же если мы принимае корм, на котром находит ся зараза, то не мусиме, але можеме легко ся заразити. Прото тыж конечно ест, штобы наши хозяйкы старали ся все прикрывати корм и хоронили его перед мухами.

Мухы сут шкодливы также и для живины. Всі хвороты може она переносити с хворых звірят на здоровы. При том, непокоит она звірята своим брэнчанем и драпанем, што также отбиват ся некористно на звірятах. Если кто при доиню коров потрафит охоронити корову от докучливости мух, то переконат ся, же корова не напастована мухами даст больше молока. Мухы перешкаджают также живині в спокойном румеганю. Румеганю звірята, хотячи штобы паша была в цілости выкористана, мусят мати при румеганю цілковитый покой, а коли мухы брэнчат колозвірят, звірята оганяют ся и непокоят, што перешкаджат им в цілковитом выкористаню пашы.

Надто, треба также знати о том, же мухы переносят хвороты с одных рослин на другы.

Як с того всего видно, так комары, як и мухы не сут лем тыма уприкреными и до-

кучливыми овадами, котры привыкли мы видіти через ціле літо в наших обыстях. Сут они нашими врагами, с котрыма треба энергично бороти ся и нищити. Николи в домі ніт за много мухолопок и других нищачих мухы прирядов. Крім того не можна николи оставляти на столі немытой посуды и останков іды. В окнах мусят быти сіткы, а в хаті, в оборі и на обыстю образцова чистота.

Втотчас позбудеме ся мух, а с нима и многих хворот.

Полевые работы.

Наближают ся жнива, а с нима час тяжелой работы. С хліба дозриват найскорше озимый ячмень, а погодивше жито, пшеница, ячмень ярый, овес и яра пшеница.

Ячмень належит жати або косити косом с грабками вчасно, закла зерно ище не ствердне, бо позднйше сыпе ся сильно с колоса. На покосах оставити, аж солома, досхне, не перевертаючи много, штобы не кыршити колоса, пак звязати и зложити до стога.

Жито належит зберати, коли солома пожолкне а зерно робит ся твердаве, хоцбы оно мало ище зеленковату барву. Через долге передержане жита на поли наражаме ся на то, же жито перестоит и найкрасше зерно высіе ся на поли.

Пшеницу збераме в сухой час, вяжеме зарас в снопы и уставяме в полустожкы. В часі дощу пшеница зрастат ся скоро.

Таксамо ярый ячмень псуе ся скоро на дожджи и уж по одном дожджи тратит свою ясну барву, стаючи ся жолто-темным. Теплый и вогкый воздух може легко спричинити зроснене ячменя, если лежит долге на покосах. Тому то треба ячмень держати на покосах лем так долге, штобы конич, котрый всіаеме звычайно, кус присох. Потом вяже ся ячмень в снопы и укладат в великы копы, колосом до середины, прикрываючи с верха мервом.

Овес также высиват ся легко, коли перестоит. Прото, як лем стебло и ряса пожолкне и горішны колінка стверднут. По скошеню, если ест сухо, можна овес зараз грабати и вязати в снопы. Если в овсі ест трава, або конич, треба овес оставити на покосах, але не долге, бо зерно на росі тратит барву. Звозити овес потреба аж втотчас, як солома ест совсем суха, бо иначе ся загрие.

Яра пшеница доходит позднйше от озимой. Зберати треба, коли начне жолкнути, бо позднйше высыпуе ся сильно, особенно вчасна отміна.

Сейчас по жнивах треба конечно стерни покладати. Вчасне подоране стерни ест обовязком каждого господара для власного добра. У нас занедбуе ся часто тоту важну роботу, а зле, бо 1) можна на подораных стернях засіяти ище пашны рослины, як ріпу, горчицу, выку и др. на зелену пашу, або на зеленый навоз, 2) через вчасне подоране стерни нищиме всякы буряны и пырей. Покладати треба якнайплытше, штобы лем саму стерень и верх землі подорвати и отвернути.

„Украинскы манібры“.

Довідуеме ся, што недавно атаман батько Махно с Лосього Скубаный с есаулами с доокрестных сел Угрына, Новой Веси, Ростокы, Ястрябика, Злоцкого и Щавника урядили на гору Яворину „манібры“ и ту долге „гомоніли и гомоніли“ старой Яворині поза уха. Были бы ище долге „гомоніли“, но атаман и есаулы взяли мало провианту на „манібры“ и гомонячам зачало в жолудках „гомоніти“, а же яфыры были ище зелены, то атаман в виду того мусіл перервати манібры и распустити зголодніле „військо“ до хыж.

Умер Георгий Чичерин.

Дня 6.VII. т.р. умер в Москві комисар заграничных діл С. С. С. Р. Георгий Чичерин. Чичерин, помимо того, што был долгий час руководителем заграничной политики Советов, не належал до партии коммунистов, ани до пролетарията.

Его отец походил со старой дворянской родины, а мати была полька, уроджена графиня Чапска. Чичерин был наравду создателем советской дипломатии и Советы завдячают ему, же мают право голоса на международной арені. Выбороти того было барз трудно, але Чичерин росогрывал свою гру по мастерскы.

По смерти Ленина, котрый звернул увагу на Чичерина и отдал ему таке высоке stanowisko, Чичерина вышмарили и скоро забыли. По слухам бывший министр загр. діл дошел до великой нужды. Оповідают, же в 1933. на улицах Москвы появил ся обсрванный и пьяный старец, котрый послідныма словами ругал советске правительство. Его арестовали. То был Чичерин. Другы розказуют, же Чичерин до смерти жил в маленькой комнаті при кооперативі „Наркоминділа“ (комисарията заграничных діл). Ему выдавали пенсию и позволили тримати фортепян. Чичерин был знаменитым музыкантом и часто цілыма годинами грал на фортепяні.

Лемковщина достала нового Апостольского Администратора.

Церковны власти заименовали Апостольским Администратором для Лемковщины Впр. О. Дра Медвецкого, Советника станиславской Консыстории.

В неділю, дня 26. липня 1936 о год. 2. пополудни отбуде ся в Ростці Великой в домі Йоана Репелы

Обще собрание

ЧЛЕНОВ ЧИТ. ИМ. М. КАЧКОВСКОГО.
Просит ся о численне прибыте

Выділ.

В селі Нова-весь новосандецкого повіта отбуде ся

ДНЯ 26. ЛИПНЯ 1936 о год. 4-ой

Обще Собрание

ЧЛЕНОВ ЧИТ. ИМ. М. КАЧКОВСКОГО,
на котре запрашаме доокрестне селянство и интеллигенцию.

За выділ читальні:

Секретар: Захар Дрожжак
Предсідатель: Петро Маркович.

Што чути в світі.

Женева: Конференція санкційного комітета, до котрого належат всі члени Лиги Народов за виключенням Італії і Абиссинії постановила перервати санкції проти Італії з днем 15. липня 1936 р.

Льондон: В половині липня Англія має откликати велику частку своєї флоты со Середземного Моря.

Льондон: Негус вернул с Женеви до Лондона і оголосил отозву до англійського народу, завзиваючи до складання грошей на дальшу війну проти Італії.

Негус заявив, же для переведення побідноснової війны потреба 100 самолетов и 2 милиони фунтов штерлингов (50 милионов злотых).

Женева: На засіданню Рады Лиги Народов обрадовано над справом Гданьска. Президент Сената Гданьска Грейзер жадал знесення уряду Высокого Комисара Лиги Народов.

В Полудневом Кытаю увеличатся антыяпонский рух, котрый поддержує заграница. До Кантона приїхало много амерыканских летчиков, а заграничны фирмы достарчают войскам полуднево-кытайским оружиє.

Парыж: Незадолго маюти начати ся переговоры в ціли заключеня договора взаємной войскової помочи меже Франциом и Турциом, котрый має быти такий сам, як заключеный договор меже Франциом, Совітами и Чехосвакиом. В случаю заключеня того договора повстане великий войсковый бльок, обнимающий Францию, Россию, Турцию, Югославию, Румунию и Чехословакию.

Рыга: Буря, котра перешла недавно над Литвом и Латвиом, спричинила величезны шкоды в рольництві. Буря змела с поверхні землі цілы села. На великих пространствах перервано полученя телефонны и телеграфичны. Страшный вітер и громы убили кількадесятеро людей и статку.

Нью-Йорк: Оден амерыканец (Беганский) хоче в незвычайный способ переплынути с Амерыкы до Европы через Атлантыйский океан, а именно в бочці. Побудована ведля проєкта Беганского бочка має 3 метры высоты и 2 метры проміру. Дно єст обтяжене оловом, штобы бочка могла плынути стоячи. У горы находит ся рура — вентилятор, котра має дати доплыв воздуха в час бурі. Беганский має начати незвычайну подорож с концем того місяца.

В Голянли в місцевости Бреда отбыла ся дня 30. червня тайна конференція комунистычных предводителей. Конференція тотта была свого рода военном радом. Комунистычны предводители ствердили на конференции, же так подходячого момента до пороблення пробы генеральной світової революції, як тепер, ище не было и же належит зробити тоту пробу с концем вересня, або в початках жолтня.

Нью-Йорк: В Америці єст страшна спека и посуха. Температура доходит до 50 градусов. Жнива в державах Минесота и Дакота можна уважати за втрачены. Дотеперешны шкоды обчислюют на 300 милионов долларов. В многих містах топится от спеки асфальт. В Дакота погынули от спеки стада живины и населенє находить ся в нужді и потребує безотложной помочи.

Парыж: В політычных кругах Парыжа выкликала велике занепокоєнє вість с Берлина, же німецке правительство намірять перевести в Гданьску плебисцит и надіє ся, же тотто всенародне голосованє выпадє на корить Німеччины. Англійский министр заграничных діл Иден мал отбыти в той справі розговор с польским министром Беком и высказати ся, же Англія не допустит до прилученя Гданьска до Німеччины.

Ерусалим: В Палестыні не устає борба меже жидами и арабами. Арабы подпалили в Ерусалимі кілька жидовских склепов и нападают в цілом краю на жидов.

Вісти с краю.

Варшава: Финансовы власти маюти выдати в найближих днях зарядженє о вздержаню податковых екзекуций у селян на час жнив. Вздержанє податковых екзекуций буде тревати 4 тыждні.

Варшава: В половині того місяца новый италийский амбасадор Валентино має вручити П. Президенту Р. П. ввірительну грамоту в Кракові на Вавелю. Акт тот має отбыти ся торжественно со взгляда на приятельскы отношеня меже Польцом и Италиом.

Крыница: От долшого часу росходила ся поголоска на тему наміреного „маршу хлопов” на Крыницу, где хлопы мали вручити П. Президенту Р. П. просьбу о подобном содержанию до резолюции оголошених на с'їзді в Новосельцах (меже другим мали


жадати поворота Витоса до краю). В звязи с тыма поголосками „Stronnictwo Ludowe” оголосило заявленє, же не мало и не має наміреня уряджати ниякой політычной манифестации в Крыници, а єсли такы факты мали місце, то носили они характер чисто місцевый.

Крыница: Дня 6. т. м. делегация под председательством бурмистра м-ра Закржевского, зложена с вицебурмистра инж. Крувкы, лавников Дра Гнатышака, Дра Заржицкого и Д-ра Шварца в присутстві Воєводы Краковскового, Старосты Дра Лаха и дыректора инж. Новотарского зложила П. Президенту прекрасно зроблену грамоту почетного гражданина Крыницы. П. Президент угостил делегацию чаєм и интересовал ся живо розвитєм Крыницы.

Пржеворск: Дня 2. VII. в селі Кржешовицы в маєтку Польской Академии Знания заштрайковали рольны роботники с причины низкой платы. В часі штрайку дошло до биткы меже роботниками и полициом. Заатакована полиция начала стріляти, в наслідок чого убито 7-еро люда, а ранено 27. С полиции єст ранених 20 полициянтов.

Мушина: В ноци на 8. т. м. перешла в окрестности Мушины страшна буря. От грому повстал пожар в селі Дубне и спалило ся 6 будынков господарских. Школа, до котрой доставал ся пожар, єст сильно знищена. Таксамо в Тыличи спалили ся той самой ноци два будынки господарчи. Біда погорільцов єст тым больша, же в прошлом року Тылич и Дубне знищил град.

Варшава: Статыстычный уряд подає, же число кооператывов в Польщі увеличат ся стало. За перший квартал 1936 р. прибыло новых 154 кооператывов. С тых найбільше єст кредитовых кооператывов, дальше идути молочарскы кооператывы, а на конец рольно-хозяйственны.



КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,
НЕХАЙ ЯКНАЙСКОРШЕ

заасекурує ся
в асекураційном Товаристві
ВИТА И КРАКОВСКЕ
во ЛЬВОВІ

Асекурацію приймают на цілой Лемковщині
представителі: гг. Осиф Яновицкий — Крыница-Село и Михаил Перелом — Сянок.